

《阿彌陀佛四十八大願》

第一大願：設我得佛，國有地獄、餓鬼、畜生者，不取正覺。
第二大願：設我得佛，國中人天，壽終之後，復更三惡道者，不取正覺。

第三大願：設我得佛，國中人天，不悉真金色者，不取正覺。

第四大願：設我得佛，國中人天，形色不同有好醜者，不取正覺。

第五大願：設我得佛，國中人天，悉識宿命，下至知百千億那由他諸劫事者，不取正覺。

第六大願：設我得佛，國中人天，不得天眼，下至見百千億那由他諸佛國者，不取正覺。

第七大願：設我得佛，國中人天，不得天耳，下至聞百千億那由他諸佛所說，不悉受持者，不取正覺。

第八大願：設我得佛，國中人天，不得見他心智，下至知百千億那由他諸佛國中眾生心念者，不取正覺。

第九大願：設我得佛，國中人天，不得神足，於一念頃下至不能超過百千億那由他諸佛國者，不取正覺。

第十大願：設我得佛，國中人天，若起想念貪計身者，不取正覺。

第十一大願：設我得佛，國中人天，不住定聚，必至滅度者，不取正覺。

第十二大願：設我得佛，光明有能限量，下至不照百千億那由他諸佛國者，不取正覺。

第十三大願：設我得佛，壽命有能限量，下至百千億那由他劫者，不取正覺。

第十四大願：設我得佛，國中聲聞有能計量，乃至三千大千世界眾生緣覺，於百千劫悉共計校知其數者，不取正覺。

第十五大願：設我得佛，國中人天，壽命無能限量，除其本願脩短自在，若不爾者，不取正覺。

第十六大願：設我得佛，國中人天，乃至聞有不善名者，不取正覺。

第十七大願：設我得佛，十方世界無量諸佛，不悉諮嗟稱我名者，不取正覺。

第十八大願：設我得佛，十方眾生至心信樂，欲生我國乃至十念，若不生者不取正覺，唯除五逆誹謗正法。

第十九大願：設我得佛，十方眾生發菩提心修諸功德，至心發願欲生我國，臨壽終時，假令不與大眾圍遶現其人前者，不取正覺。

第二十大願：設我得佛，十方眾生聞我名號、繫念我國、植諸德本，至心迴向欲生我國，不果遂者，不取正覺。

第二十一大願：設我得佛，國中人天，不悉成滿三十二大人相者，不取正覺。

第二十二大願：設我得佛，他方佛土諸菩薩眾來生我國，究竟必至一生補處，除其本願自在所化，為眾生故被弘誓鎧，積累德本度脫一切，遊諸佛國修菩薩行，供養十方諸佛如來，開化恒沙無量眾生，使立無上正真之道，超出常倫，諸地之行，現前修習普賢之德，若不爾者不取正覺。

第二十三大願：設我得佛，國中菩薩，承佛神力供養諸佛，一食之頃不能遍至無量無數億那由他諸佛國者不取正覺。

第二十四大願：設我得佛，國中菩薩，在諸佛前現其德本，諸所求欲供養之具，若不如意者，不取正覺。

第二十五大願：設我得佛，國中菩薩不能演說一切智者，不取正覺。

第二十六大願：設我得佛，國中菩薩不得金剛那羅延身者，不取正覺。

第二十七大願：設我得佛，國中人天，一切萬物嚴淨光麗，形色殊特窮微極妙無能稱量，其諸眾生，乃至逮得天眼，有能明了辨其名數者，不取正覺。

第二十八大願：設我得佛，國中菩薩，乃至少功德者，不能知見其道場樹無量光色高四百萬里者，不取正覺。

第二十九大願：設我得佛，國中菩薩，若受讀經法諷誦持說，而不得辯才智慧者，不取正覺，

第三十大願：設我得佛，國中菩薩，智慧辯才若可限量者，不

取正覺。

第三十一大願：設我得佛，國土清淨，皆悉照見十方一切無量無數不可思議諸佛世界，猶如明鏡觀其面像，若不爾者，不取正覺，

第三十二大願：設我得佛，自地以上至于虛空，宮殿樓觀池流華樹，國土所有一切萬物，皆以無量雜寶百千種香而共合成，嚴飾奇妙超諸人天，其香普薰十方世界，菩薩聞者皆修佛行，若不爾者，不取正覺。

第三十三大願：設我得佛，十方無量不可思議諸佛世界眾生之類，蒙我光明觸其體者，身心柔軟超過人天，若不爾者，不取正覺。

第三十四大願：設我得佛，十方無量不可思議諸佛世界眾生之類，聞我名字，不得菩薩無生法忍諸深總持者，不取正覺。

第三十五大願：設我得佛，十方無量不可思議諸佛世界，其有女人聞我名字，歡喜信樂發菩提心厭惡女身，壽終之後復為女像者，不取正覺。

第三十六大願：設我得佛，十方無量不可思議諸佛世界諸菩薩眾，聞我名字，壽終之後常修梵行至成佛道，若不爾者，不取正覺。

第三十七大願：設我得佛，十方無量不可思議諸佛世界諸天人，聞我名字，五體投地稽首作禮，歡喜信樂修菩薩行，諸天

世人莫不致敬，若不爾者，不取正覺。

第三十八大願：設我得佛，國中人天，欲得衣服隨念即至，如佛所讚應法妙服自然在身，若有裁縫染治浣濯者，不取正覺。

第三十九大願：設我得佛，國中人天，所受快樂，不如漏盡比丘者，不取正覺。

第四十大願：設我得佛，國中菩薩，隨意欲見十方無量嚴淨佛土，應時如願，於寶樹中皆悉照見，猶如明鏡覩其面像，若不爾者，不取正覺。

第四十一大願：設我得佛，他方國土諸菩薩眾，聞我名字至于得佛，諸根缺陋不具足者，不取正覺。

第四十二大願：設我得佛，他方國土諸菩薩眾，聞我名字，皆悉速得清淨解脫三昧，住是三昧一發意頃，供養無量不可思議諸佛世尊，而不失定意，若不爾者，不取正覺。

第四十三大願：設我得佛，他方國土諸菩薩眾，聞我名字，壽終之後生尊貴家，若不爾者，不取正覺。

第四十四大願：設我得佛，他方國土諸菩薩眾，聞我名字，歡喜踊躍，修菩薩行具足德本，若不爾者，不取正覺。

第四十五大願：設我得佛，他方國土諸菩薩眾，聞我名字，皆悉速得普等三昧，住是三昧至于成佛，常見無量不可思議一切如來，若不爾者，不取正覺。

第四十六大願：設我得佛，國中菩薩，隨其志願所欲聞法自然

得聞，若不爾者，不取正覺。

第四十七大願：設我得佛，他方國土諸菩薩眾，聞我名字，不即得至不退轉者，不取正覺，

第四十八大願：設我得佛，他方國土諸菩薩眾，聞我名字，不即得至第一、第二、第三法忍，於諸佛法不能即得不退轉者，不取正覺。

佛告阿難，爾時法藏比丘，說此願已而說頌曰：

我建超世願，必至無上道，斯願不滿足，誓不成等覺。

我於無量劫，不為大施主，普濟諸貧苦，誓不成等覺。

我至成佛道，名聲超十方，究竟靡不聞，誓不成等覺。

離欲深正念，淨慧修梵行，志求無上道，為諸天人師。

神力演大光，普照無際土，消除三垢冥，明濟眾厄難。

開彼智慧眼，滅此昏盲闇，閉塞諸惡道，通達善趣門。

功祚成滿足，威曜朗十方，日月戢重暉，天光隱不現。

為眾開法藏，廣施功德寶，常於大眾中，說法師子吼。

供養一切佛，具足眾德本，願慧悉成滿，得為三界雄。

如佛無量智，通達靡不遍，願我功德力，等此最勝尊。

斯願若剋果，大千應感動，虛空諸天人，當雨珍妙華。

佛語阿難，法藏比丘說此頌已，應時普地六種震動，天雨妙華以散其上，自然音樂空中讚言，決定必成無上正覺。